

四庫全書

史部

欽定四庫全書

史部

山西通志卷九十

詳校官監察御史臣查善長

檢討臣德生覆勘

總校官進士臣朱鈐

校對官修撰臣吳錫齡

謄錄監生臣王元愷

欽定四庫全書

山西通志卷九十

名宦八

平陽府

明

王志臨淮人洪武元年以六安衛指揮使從渡河取懷慶澤潞留守平陽會大將軍徐達軍西征三年封六安侯復畱守平陽率兵出察罕諾爾塞還鎮平陽復

領山西都司衛所軍務上稱其處置得宜卒追封許國公諡襄簡

凌文質洪武初任趙城縣縣丞有幹濟材縣署學校委令督建文質措置有方事集而民不病祀名宦

蕭韶龍泉人洪武初任臨汾縣縣丞有能聲詳見彰善錄中祀名宦

徐本洪武初任平陽府知府建廳署葺壇廟清驛傳荒殘景象煥然一新民有苗氏子家貧母篤老乞丐以

養歷年不懈周以衣食俾獲遂其志尋奉召入朝

徐鐸南昌人洪武初以戶部侍郎改知平陽府濬永利池改建臨汾縣學祀名宦

周凱棗強人洪武初平陽府通判多政績

李諒山東濰縣人洪武二年以中書檢校任翼城縣知縣性樸素遇事治以公正修建壇壝廟學移縣治以避水患除奸宄以安良善祀名宦

薛大昉直隸蠡縣人洪武三年以進士任翼城縣縣丞

清慎愛民雅重學校嘗延元翰林李炳奎主師席文
教勃興涖任十年聲名洋溢遠近擢御史累官布政
使祀名宦

丁憲直隸棗強人洪武四年任臨汾縣知縣勤其官能
得士民心績最著詳載彰善錄中祀名宦

洪彥昇福建莆田人洪武八年以進士任汾西縣知縣
修學校建廟壇立廨舍厝注有方民不為擾祀名宦
張先洪武十一年任靈石縣恤民愛士時當草創百廢

具興

周郁山東濟南人洪武三十一年任襄陵縣知縣持身
嚴潔為政寬宏均賦役平獄訟民爭德之擢渾源知
州祀名宦

徐彪山東商河人洪武間任平陽府同知先為臨汾丞
以治行聞擢今職盜息民安威望益著祀名宦

袁景甘泉人洪武間以監生任太平縣主簿有清操能
自守嘗冬日衣單衣理事有吏夜持緼袍奉之不受

次日對衆發其事按以法聞者聳然涖任七年擢監
察御史祀名宦

賈昭濟陽舉人洪武間靈石教諭學行卓越歷官湖廣
布政司左參政陞雲南布政使

陳宗哲歸德人洪武間任岳陽招集流亡改科田稅民
樂歸之

劉亨遵化人洪武間任汾西為政公平操守廉潔陞本
府同知

劉濬臨川人永樂初任臨汾守身廉謹政平訟簡吏民不敢欺陞湖廣僉事

曹端字正夫澠池人永樂六年舉人為霍州學正修明聖學諸生服從其教郡人皆化之恥爭訟監司大吏必造謁知府郭晟問為政端曰其公廉乎公則民不敢慢廉則吏不敢欺晟拜受教艱歸澠池霍州諸生多就墓次受學服闋改蒲州學正霍蒲兩州各上章爭之霍奏先得請先後在霍十六載宣德九年卒官

年五十九諸生服心喪三年霍人罷市巷哭童子皆流涕貧不能歸葬遂留葬霍二子瑜琛亦廬端墓相繼卒葬墓側後改葬澠池端為明理學之冠學者稱

月川先生

萬觀字經訓南昌人永樂十九年進士知嚴州府治行為海內第一服闋嚴金衢民交乞之朝廷異焉補平陽府政績益茂有芝生堯祠棟上士民皆言使君德化所致觀曰太守知奉職而已芝非吾事也考滿擢

山東左布政使卒

楊睿河南柘城人永樂間任平陽府知府明習治體厝注咸合民情未數月刑清政簡境大治遇荒旱禱雨立應尋卒於官祀名宦

傅榮洋縣人永樂間任曲沃以剛明著聲

張廉字惟清咸寧人永樂癸卯鄉薦由山西臨汾縣丞調州判官用保陞知州剗剗積弊檢飭條法扶植柔善繩抑豪強修舉學政俱以誠信行之數十年無非

法一事以擾其屬縣一日薛文清過其廳事朗朗聞誦讀聲問之則曰課吏讀律使知畏法且不暇游惰耳丁內艱歸

楊璿蠡縣人永樂末進士知趙城縣課績為山西最仕至浙江右布政使卒

賀琳宜君人洪熙時浮山縣丞贊政不苛嘗捐俸備禮勸富民助償逋稅自是流移復業及憂去民饋贐不受泣送者至數百人

王磐山東沂州人宣德初知浮山縣廉鯁不屈遇旱齋戒自責徒跣拜禱得雨而後已及去民攀留泣下

丁璉河南鄆陵人宣德五年以舉人任襄陵縣訓導學博行高見文廟頽廢慨然修葺訓諸生先行後文擢翼城知縣祀名宦

王彧直隸開州人正統六年任洪洞縣知縣廉幹有善政嘗遇大水禾稼漂沒彧履畝親勘即以其狀上聞得免租稅祀名宦

楊志學河南河內人正統九年以舉人任襄陵縣教諭少從薛文清遊講明心性操履清慎訓誨勤篤涖教八年卒於官貧不能斂厝城外僧舍文清過而哭焉後子御史徽始扶柩歸葬

何子聰直隸吳橋人正統間以進士任趙城縣知縣嗜讀工書為政體悉民情以愷悌著而建城創廟為百姓永利厥功尤偉祀名宦

張傑陝西鳳翔人正統間以舉人任趙城縣訓導學閔

博於五經尤邃涖官以禮義廉恥為教祀名宦

賈珪巴縣人正統間任汾西清勤仁恕

張元陝西人天順四年以舉人任襄陵縣教諭工詩學
為生徒講解隆冬盛暑不輟沐其教者皆興起科第
甲一時擢國子監博士祀名宦

王珏字廷玉山東昌邑人天順六年以歲貢任翼城知
縣清勤端恪撫細民如子民亦愛如父母間出米豆
奉之輒欣然樂受少有犯法立治之不貸威信甚著

解官去爭奪肩輿肩之前受笞者亦競前泣下邑故多循吏然必以山東王為稱首山東王者翼人追稱之辭也祀名宦

薛驥江南華亭人成化二年謫襄陵縣知縣先官御史稱敢言及隸縣事慈祥愷悌以簡易著卒以不附權貴解組歸祀名宦

樊瑩字廷璧常山人天順末進士成化末知平陽府有聲弘治初許大臣保舉方面官侍郎黃孔昭以瑩應

尚書王恕亦器之擢按察使仕至刑部尚書致仕卒
贈太子少保謚清惠

謝謙山東章邱人成化七年以舉人任襄陵縣知縣性
謹厚事無大小必慎以處之不敢忽然發奸摘伏稱
有為上官屢旌異之祀名宦

李琮順天人成化十九年知平陽府甫下車即除積豪
為民患者數人皆預訪其款蹟繫之庭以實之均俯
首伏罪由是合郡安堵時有神明太守之頌不期年

政簡刑清吏民懷之

賴英任邳人成化間任翼城令仁以御民嚴以束吏民皆慕之

吳佐西安人成化間曲沃教諭以憂去補稷山教諭著大學經傳元編人多傳之

劉璣字用齊陝西咸寧人成化十七年進士除曲沃知縣縣產棗民有罪令入棗贖積數萬斛歲饑賑粟不給發棗繼之正德中仕至戶部尚書致仕卒

李洛直隸故城人成化十八年以進士任襄陵縣知縣
明於吏事嘗置二簿記民間善惡以時勸懲歲凶煮
粥食饑者纂修縣志徵文考獻稱一時信史擢監察
御史祀名宦

王綸直隸開州人成化間以進士任浮山縣知縣綸夙
負文學名待士有禮而治民尤勤嘗刻表忠勸學二
錄令民間誦讀祀名宦

胡睿直隸長垣人成化間以進士任平陽府知府有清

操臨事謹慎為政以精密著祀名宦

姜寔陝西蒲城人弘治三年以進士任曲沃縣知縣謹
慎清介嘗作詩自厲後擢御史巡視河東鹽政遇歲
飢撈鹽數百萬引抵民間田租復設法賑給祀名宦
趙元涇陽人弘治間翼城教諭學問老成教規嚴整生
徒貧者周給之

閻愷涇陽人弘治間翼城教諭教有成效利無苟得以
禮經授生徒至今傳之

陳瑀麗水舉人弘治間浮山教諭有文名卒於官凡一時碑記多出其手

周雲徐州人弘治間任曲沃公直廉介吏畏而民服

郭桂字時芳咸寧人元時鐵冠御史之後以進士為令守理訟決獄人人稱服服闋補平陽知府百姓凋敝藩邸下人怙勢侮法無敢誰何桂至而盜賊息州縣平藩邸各輯其下百姓安堵新堯廟增修舜禹廟告成洪洞戶部尚書韓紳年八十餘家居賓客非其人

不與見乃安車入平陽謁謝曰老人無所求強為百姓一行耳未久擢山西右參政分蒞冀北督邊儲以病乞歸

杜忠字世臣河陰人成化戊戌進士弘治辛亥以監察御史出守平陽括蒼俞尚賢稱其百廢俱興民心愛戴庚申遷本省布政司左參政未幾拜右副都御史巡撫延綏乞休命下而卒

張賢字堯臣祥符人弘治七年任襄陵縣知縣先授單

縣邑豪貴子暴橫強奪人妻女賢按治如法及涖襄陵有山泉可資灌溉為臨汾勢家所據賢廉得立奪之返諸民擢慶陽同知遷順慶知府忤劉瑾罷歸瑾誅起太原知府時邊警甚亟游騎至太原有陳憲使者夜飲宗室第中賢單騎叩其門曰邊患孔棘非燕飲時也其慙直如此比卒襄陵人立祠祀之

李高河南虞城人弘治十年以進士任襄陵縣知縣剛明清勤善折獄鄰境有冤抑胥來質成嘗創置汾橋

開通山坂又時集諸生講授文法在任五年獎勞者
一旌異者五士民勒其善政四十餘事於石擢監察
御史祀名宦

邢昭直隸三河人弘治十年以進士任洪洞縣知縣居
官清慎民有訟者引至堂前曉以義理令其愧悔復
時至田間勸督農桑而崇師課士尤有禮祀名宦

張文佐河南西平人弘治十一年以進士任平陽府知
府文佐有孝行先官襄陵以廉名及涖府事清譽益

著嘗行朱子社倉法鼎新學宮延名人主師席祀名
宦

張鵬山東歷城人成化十二年以進士任襄陵縣知縣
持躬廉謹牧民有方未浹期刑清訟簡吏民畏服襄
陵俗於父母喪多偷葬鵬力革之令從厚尤加意學
校士類咸荷甄陶擢監察御史祀名宦

張雲河南信陽人弘治十五年以進士任襄陵縣知縣
性平易嘗謂親民官尊嚴如神非父母斯民本意故

其撫綏恩意曲至累官戶部尚書祀名宦

羅端河南鄧州人弘治間以舉人任浮山縣知縣仁厚廉明嘗遇歲荒設法賑濟尋卒士民隕涕罷市祀名

宦

李伸三原進士弘治間知臨汾縣王府軍校肆橫至殺人前令莫敢治伸至悉寘之法境內肅然擢御史

向明巢縣人弘治間以舉人任趙城縣知縣禮士愛民具有成效遇昏喪不能自給者捐俸助之卒於官祀

名宦

尹球陝西秦州人弘治間以進士任太平縣知縣有威望立法以嚴明勝愛民教士有古循吏風祀名宦

姚顯浙江德清人弘治間以舉人任岳陽縣知縣勤於政事愛民嘗視之如傷嚴於馭吏悉畏服不敢肆祀名宦

何鳴謙陝西高苑人弘治間以舉人任曲沃縣教諭講學課藝無虛日嘗與諸生同宿學舍中夜二鼓督讀

益力貧不能自給者捐俸資之涖任二年卒諸生哭甚哀祀名宦

路欽直隸永年人正德五年以監生任汾西縣知縣宅心正大持身廉潔為政剛果立決人以私謁者謝弗與通祀名宦

侯秩直隸長垣人正德十二年以進士任曲沃縣知縣嚴重不輕興禮正俗救荒止暴退食後引諸生與疏經史奧義一時學者以山斗歸之祀名宦

任繼宗蒲臺人正德間任岳陽縣教諭端重有令望勤於訓誨寒暑不少間諸生翕然尊之祀名宦

元思永河南湯陰人正德間以舉人任岳陽縣知縣廉幹有能聲尤加意學校增修聖廟尊師重士時人比之文翁焉祀名宦

黃直直隸人正德間以翰林院編修謫趙城縣教諭文章品望卓絕一時日進諸生與講論經史不以官微稍懈祀名宦

葛禮順天人正德間任曲沃鋤強抑暴惡人遠跡甃砌
城採民到今便之陞御史終光祿卿

蔣瓚字君器山東高唐人正德間以舉人知繁峙縣以
能調翼城令為人廉平訓小民如誡子弟折獄甚愜
人情陞定州知州累官郎中

黃甲陝西人任汾西實心實政鑄火器修城池經亂無
虞入名宦祠

浦鉉字汝器文登人正德十二年進士授洪洞知縣有

異政嘉靖初名為御史以疏救富平楊爵杖卒穆宗
初復官贈光祿卿

張琴雞澤人正德十五年以歲貢任翼城縣縣丞剛正
自守秩俸外一無所取又寡諧不輕與人接公事後
閉戶吟嘯清介絕俗以艱去嘉靖初補聞喜後擢太
原府經歷祀名宦

李暹字德進直隸滑縣人正德十六年以舉人任曲沃
縣知縣精敏達治體嘗作勸民十二事揭通衢詳豁

代納銀兩葺學宮毀淫祠正經界嚴斥堠政教修明
倉糧贏至數萬訟獄衰息又立兩驛接遞界正南北
交界坊迄今遵守後擢隴州知州累官布政使參議
祀名宦

聶豹字文蔚吉安永豐人正德十二年進士嘉靖中為
平陽知府時山西頻中寇民無寧居豹令富民出錢
罪疑者贖得萬餘金修靈石郭家溝冷泉諸關隘練
鄉勇六千守之寇來犯被却廷議以豹為知兵給事

中劉繪大學士嚴嵩皆薦之擢潼關備兵副使言官
論豹在平陽乾沒大學士夏言惡豹落職二十九年
徐階薦擢兵部右侍郎仇鸞請調宣大兵入衛豹陳
宜固守宣大宣大安則內地安三十一年為兵部尚
書秋寇入山西總兵李漆軍覆總督蘇祐報捷巡按
御史毛鵬發之豹請論功行賞尋罷歸卒隆慶初贈
少保

張衍瑞字元承汲縣人正德中為吏部郎中諫南幸受

杖下獄謫平陽府同知嘉靖中召還卒贈太僕卿

王利山東陽信人嘉靖三年以舉人任翼城縣知縣廉
正有執守初下車即捕數大猾置於法每涖民威嚴
若神凜不可犯而慈惠通達於閭里利害無不周悉
厝注咸中肯綮擢工部郎中祀名宦

張永清山東萊蕪人嘉靖六年以監生任靈石縣縣丞
性方嚴涖政清慎尋卒於官祀名宦

楚書陝西寧夏人嘉靖七年以進士任曲沃縣知縣果

毅有偉度長於應變撫小弱治豪猾吏畏民服尋擢
兵部主事大同兵變單騎往定之累官都察院都御
史祀名宦

王庚直隸灤州人嘉靖十年以進士任襄陵縣知縣仁
厚愷悌凡所施設雅稱廉平累官左布政祀名宦

岳倫淮安衛人嘉靖十一年以進士任曲沃縣知縣先
任行人有直聲改授縣以寬撫民以嚴馭吏嘗念賦
役日煩申免代納銀兩三分之二後大同兵變再疏

言兵事歷官郎中以諫死祀名宦

何思直隸雄縣人嘉靖十三年以進士任襄陵縣知縣
年甚少撫民造士雖練達老成無以過邑有巨憝廉
得之立寘諸法豪貴屏息良善獲安累官都御史祀
名宦

趙統臨潼人進士嘉靖十五年知臨汾縣性素剛直請
託饋遺胥絕豁里書飛詭之積弊免闔邑荒地之徵
輸嚴惰農之禁立社倉之法使民有無相通流遺復

業者千餘家作社學修文廟改明倫堂建尊經閣師
生學舍凡數百楹復薄正祭器課訓生徒葺邑治毀
淫祠新帝堯之陵其餘善政甚多後擢知蒲州邑人
立遺愛碑

咎如思陝西三原人嘉靖十五年以進士任洪洞縣知
縣練達吏事為政以嚴勝發奸摘伏時稱神君邑有
兇悍橫肆為人害立剪鋤之祀名宦

高節陝西咸寧人嘉靖十六年以進士任襄陵縣知縣

性廉潔嚴於嫉惡有犯者必痛治之而體悉民瘼以
慈祥著嘗為省里甲均賦役公庭累月絕敲朴聲累
官河南知府祀名宦

种奎四川階平人嘉靖十七年以監生任靈石縣知縣
精明仁恕濬築城池疏通水利所措施皆有實惠祀
名宦

劉光遠河南杞縣人嘉靖三十一年以進士任翼城縣
知縣性儉樸翼故有代辦差銀為累力請上官得免

五百餘兩民獲少蘇累官苑馬少卿祀名宦

陰秉暘河南汲縣人嘉靖三十一年以進士任曲沃縣知縣立社倉勸民積穀出所著讀書抄授諸生使知體用之學尋擢御史祀名宦

張學顏字子愚直隸肥鄉人嘉靖三十三年以進士任曲沃縣知縣尚嚴明而不至暴斃當地震後城池公署傾圮略盡竭力營繕不一科諸里甲故大役煩興而民不病後擢工科給事中累官戶部尚書

褚相海寧人嘉靖三十五年由進士知霍州申除徐溝
蒲縣等處助差銀審定輪編夫役歲省郡貲數百創
建霍山正學書院集庠彥肄業其中朔望親詣講學
寒暑無輟士民立祠祀之

劉孝河南安陽人嘉靖三十六年以進士任曲沃縣知
縣淳厚不喜為刻覈涖任時適地震未幾瘡痍猶未
起益崇寬大與民休息而於奸黠者則痛繩以法不
少恕祀名宦

王植安定人嘉靖三十八年以舉人任靈石縣知縣明
敏慈惠修學造士尤竭其力祀名宦

單訥直隸棗強人嘉靖四十二年以進士任翼城縣知
縣視事勤敏剖決獄訟無留滯嘗請蠲代辦銀兩朔
望謁聖畢即為諸生講修己正人之道丞某嘗以帑
羨金進叱之病篤邑參議劉志助以木不受及卒士
民流涕祀名宦

張國彥直隸邯鄲人嘉靖四十二年以進士任襄陵縣

知縣廉重持大體以科條正民俗以忠孝振士習嘗
遇旱步禱數十里至龍祠父老憫其勞國彥曰一身
何足恤獨吾民荒歉可念耳擢兵科給事中民立祠
祀之

丁由義山東泗水人嘉靖四十五年以歲貢任襄陵縣
縣丞廉介甘澹泊撫恤小民備至嘗署曲沃篆卒於
官棺衾無所出知縣宋之韓賻之祀名宦

毛愷浙江進士嘉靖間知平陽府懲奸剔弊吏畏如神

旋陞本省參政累官刑部尚書謚端簡

劉衍祚洛陽人嘉靖間以進士任平陽府同知時南北用兵其冬地大震城市為墟不逞者聚眾為亂而郡守及各屬令俱入覲衍祚代篆開誠布公明法飭令緩刑薄稅築城修廨慎守封疆復開樊家河為永利渠築石堰障水溉田數十頃郡人建祠祀之

耿儒陝西武功人嘉靖間以舉人任太平縣知縣剛介習事為政以明察著捕盜有法胥聞風遠徙嘗增學

校砌城堞壇壝橋梁以次修舉擢廣平通判祀名宦
羅潮直隸三河人嘉靖間以舉人任太平縣知縣雅意
愛民謂閭井未安皆供億為累按經制力裁其冗濫
者遠邇霑澤擢磁州知州祀名宦

強自省陝西鳳翔人舉人嘉靖間任趙城教諭建鄉賢
名宦祠修講堂號舍造祭器性剛直課士勤敏後署
汾西陞芮城縣胥有惠政

宋之韓武安人嘉靖間任襄陵才猷迥異器宇淵宏墾

田均徭政清訟理市廛不擾俗易風移蓋能吏云

周冕貴州人嘉靖間以貢生任岳陽縣知縣通敏能斷
案無留牘祀名宦

李應竒陝西鎮原人嘉靖間以進士任岳陽縣知縣慈
仁不苛凡所興除悉中利弊民歌其惠祀名宦

劉魯生恩縣進士嘉靖間任曲沃涖事勤敏政多撫字
初終罔倦始作邑乘以備文獻行取御史

郭庭梧字子材新鄉進士嘉靖間任曲沃刑清政舉吏

民畏服二驛衝要歲費不貲以站銀羨餘貲僱歲省數千金沃代吉永徭歲若干極力論辯歸之民始甦歲飢捐俸賑濟存活甚衆修濬城池節力時使民不知勞陞監察御史歷官府丞

楊時寧河南祥符人隆慶間以進士知曲沃縣處事周詳慎密馭吏胥嚴而有體期年政成威惠並著嘗均丁徭差役遠近貧富稱便百姓勒其事於石肖像祀之尋擢吏部主事累官兵部尚書

喬因羽陝西耀州人萬曆八年以進士任洪洞縣知縣
修學宮建奎樓立社倉清賦役至捐俸築公署買馬
甦傳郵歲省民費幾千金尤為實德擢兵部主事祀
名宦

何出光河南扶溝人萬曆十一年以進士任曲沃縣知
縣初下車即革除里甲供應諸項歲飢發粟賑貸兼
設粥廠數十處疫作施醫藥有死者輒埋瘞之朔望
詣學宮為諸生講經立社課藝手自丹黃擢監察御

史記名宦

邢雲路直隸安肅人萬曆十四年以進士任臨汾縣知縣時值大飢流亡載道銳意賑恤有餓莩輒掩覆之嘗築千金堰興水利開永豐渠防水患輯縣志著冠婚喪祭議正禮俗又於四門建惠民局於驛建生園文章政事為一時冠在任五年後立祠滂河

王榮誥陝西華州人萬曆十七年以舉人任臨汾縣教諭博學工詞章教士能遵蘇湖遺法祀名宦

馬從龍山東安邱人萬曆十九年由進士任洪洞縣端
方鎮靜定催科條例至今為晉省式折獄有清獻孝
肅之風

房壯麗字威甫直隸安州人萬曆二十七年以進士知
襄陵縣持身廉潔為政和平敦大而綜理細事無不
畢舉後官吏部尚書襄陵人為樹去思碑焉

毛炯直隸任縣人萬曆三十四年以舉人任汾西縣知
縣心如法嚴痛絕私謁興學校教紡織栽桑柳體察

民情纖悉備至祀名宦

方應明河南光州人萬曆三十五年由進士任壺關縣
調繁洪洞興利除弊有神君之稱尤惓惓育材嘗拔
士授經義咸登科第時號八俊士民建祠立碑

趙彥復河南杞縣人萬曆三十六年以進士任曲沃縣
知縣廉敏有治劇材嘗減均徭募驛馬革堡官門禁
諸役煮粥賑飢延邑人閻重光輯沃史擢戶部主事
祀名宦

周鼎江南宜興人萬歷四十一年以進士任平陽推官
有清操州縣吏餽送者嚴禁之不使至嘗署府篆所
有羨銀俱貯庫上報公事後布被紙帳突蕭然無煙
後遷兵部主事累官總理河道工部尚書

馮逢臯陝西三原人萬歷四十一年以進士任襄陵縣
知縣嘗修書院以育人材成晉橋以通道塗興水利
以灌田畝政績卓然民為立碑識之祀名宦

周士樸字丹其商邱人萬歷四十一年進士除曲沃知

縣度量寬洪喜怒不形持大體不喜鈎距愛民出於至誠以德化之民亦洽其德化相戒不犯陞禮科給事中仕至工部尚書賊陷商邱死之

傅淑訓湖廣孝感人萬歷四十三年以進士知平陽府少事父母有孝名居官廉正遇凶荒煮粥賑饑公退閉閣纂志網羅放失成一郡信史尋遷本省督學道稱公明後累官戶部尚書

萬一本江南全椒人萬歷四十八年以選貢任平陽府

通判明敏具幹濟材屢署州縣所至皆有能聲後解組去凡前所蒞地士民胥遮道送之祀名宦

陳勗字典伯莒州進士萬厯間任襄陵持躬敷政正直端亮至其玉成多士邑內簪纓皆其桃李

楊作楫字夢符蓬溪進士萬厯間自聞喜調任襄陵節費甦民編審尤協輿情有神君慈母之稱官至山西督學道

侯于魯字子建陝西渭南縣人萬厯間以舉人知太平

縣才幹素裕諳達民情建清儲鎮開墾荒田陞保德
州知州

沈時敘祥符進士萬厯間任曲沃發奸除暴政教嚴明
刑清訟簡民服吏畏清丈地畝均平糧石民力大甦
行取御史

張遂華州舉人萬厯間任霍州德政廉明發奸摘伏歷
久稱頌不忘

劉餘祐字玉孺山東濱州人順天宛平籍進士知平陽

府端毅孝慈持守狷潔時有知州餽送黃金觀音一尊巖絕之陞河南睢陳道參政遷本省右布政使趙曲鎮有遺愛生祠

董殿修山東長清縣人亞魁萬厯間知趙城縣舉行鄉約修建學宮開董家渠於城北引汾水灌田數百畝民至今賴之操行清潔去之日行李蕭然

楊楠陝西盤屋人萬厯間以舉人知霍州性莊嚴為政簡而有體立文社督諸生講藝指示奧窔尤倡明心

性學力請故學正曹端從祀孔廟

張維世太康人萬曆四十四年進士歷官平陽知府捕
治絳州奸猾數十人就遷副使分巡其地累官宣府
巡撫崇禎十五年二月流賊攻太康與知縣魏令望
拒守城陷抗節死

李嵩直隸棗強人天啟三年以進士任翼城縣知縣慈
敏多惠政邑舊有代辦差銀雖經前令革免猶存六
百餘兩至是力請悉除之擢御史出按本省待翼民

尤厚遇兵荒既捐金賑貸更為疏蠲正供累官湖廣
布政使祀名宦

周文斗山東沂州人崇禎元年以進士任臨汾縣知縣
時東西山賊徧起而郡城故無兵可守文斗命衛指
揮王章督率武生及壯快衛軍時時征勦躬自調度
兵食為百姓捍禦賊不敢犯士民立祠祀之

王孕長字慶我北直吳橋人崇禎三年以進士知翼城
縣尋遷澤州知州廉介剛正為政以息訟勸農為先

在翼城建文峰東南科名日起儲備守禦具寇至不能為害在澤州嘗作愛錢歌詞雖俚而痛切可警世之役役於利者後以河南憲副死闖逆之難

魏公韓湖廣黃岡人崇禎三年以進士知太平縣縣為栢繫故里祠與墓為人侵占幾漫滅不可識公韓釐正之重加修理邑遭寇患城垣圯壞公韓請於上官復募諸紳士悉力築之屹屹言言已而寇復至督鄉兵捍禦斬獲無算民立生祠祀焉

李士淳廣東程鄉人崇禎四年以進士任翼城縣知縣
績學工文有吏才涖政能勤崇禮士子嘗建翔山書
院講藝課業雖寇臨城下不為輟調曲沃縣擢翰林
編修祀名宦

常克念洛陽人舉進士為平陽府推官有聲崇禎十四
年正月洛陽陷抗節死

李用質山東濟寧人崇禎十四年以進士任襄陵縣知
縣性慈祥居官無赫赫名而當機立斷胥中肯綮值

歲飢設厰煮粥擢兵科給事中祀名宦

李乘雲高陽人舉於鄉崇禎中授浮山知縣流賊數萬來寇手發一矢斃其魁衆遂遁累遷山西僉事卅四年以才調大梁道賊破禹州亂刃交下而死贈光祿卿

程世昌光山進士崇禎間知平陽府率屬以正馭吏以嚴陞直太道

劉士璉遼東進士崇禎間平陽府推官慈祥豈弟多所

平反

張質商水人為臨汾知縣後賊陷商水抗賊死

尹任臨清州人嘗任臨汾知縣歸殉節於鄉

張文光河南祥符人崇禎間以進士任曲沃縣知縣才

器卓犖重君父大義熟習戎事時流氛蠢動練鄉勇

較騎射教以坐作進退之法威聲遠播賊莫敢犯祀

名宦

耿章光山東館陶人山西巡撫如杞子如杞忤魏璫下

詔獄章光充家僮侍獄中崇禎間以進士知曲沃縣
性剛方以蒙城驛代翼走馬為邑累抗顏大吏前援
祖制與爭退復具詳以請尋調簡香河瀕行遺一聯
寅賓館中曰解印空傳去害馬移山何日是堅城自
書其旁云是沃兩大事敢以望後之君子祀名宦

項易河南禹州人崇禎間以貢生陞曲沃教諭方嚴端
重言動不苟諸生成服其教後擢沙河縣知縣以殉

難著

侯昂祿直隸良鄉人崇禎間任霍州州判質直有勇略
嘗署本州篆適闖賊兵過霍當孔道賊并力攻之昂
祿督士民登陴固守城破被執不屈死

國朝

秦加兆奉天人順治元年任趙城縣知縣肅胥役平差
徭招撫流亡闢南路以廣通衢又設學田修中鎮廟
暨趙簡子祠循聲懋著擢平陽知府後歷江西左布
政祀名宦

張尚遼東籍浙江山陰人順治二年知平陽府揮霍長才精於吏治文移隨折隨批吏不能點竄一字陞巡撫甘肅都御史

趙昉字海曙山東武城人由進士順治二年知翼城縣慈祥練達饒有大略時東山邪教倡亂昉密請兵征勦殲其渠魁城獲全

徐來麟奉天人順治五年知平陽府是年冬姜逆據雲中以叛遣其黨平德攻平陽來麟擐甲登城竭力捍

禦獲全已而延安王老虎應逆渡河拔汾州復攻平陽來麟與王巡道無黨范參將永宗固守間出銳師擊之擒其將劉光明賊為奪氣一夕昇雲梯潛過外壕謀登城城上矢石並發乃却會大兵至始解圍走來麟率兵追之斬賊首劉四亨於峪口村餘衆悉潰當是時賊勢甚熾圍城七晝夜來麟能以孤城抗方張之焰卒獲底定論者皆多其績

何斯美陝西鎮番衛人順治五年以舉人知翼城縣姜

逆之亂翼被兵尤數斯美與弟斯盛督鄉勇禦之六年七月賊衆數萬猝至圍縣城九晝夜斯美竭力捍禦勿遽中談笑自若人皆恃以無恐時平陽州縣獨翼城獲完斯美力也後遷開封府同知以去翼人建祠祀之弟斯盛臨陣有功又偕斯美殫力守城後以勦賊歿於陣翼人德之亦立廟祀

魯班禮順治間任鎮標營都司管遊擊事死姜逆之亂贈遊擊祀忠烈祠

劉懋德順治間任沂鎮營遊擊死姜逆之亂

贈參將祀忠烈祠

王來觀遼東人嘗任河南分守道降霍州知州姜逆之亂以霍為南北孔道攻尤力來觀督兵以守城陷血戰死祀忠烈祠

安應麟奉天人順治六年以貢知浮山縣姜瓖餘孽盤踞縣東南令千總秦文英鄉耆張三鳳入賊巢諭之降偽遊擊李標元等八百餘人胥散遣歸農又請豁

荒糧數千石民漸蘇而以其暇修縣治之前為賊燬者亦為得治體焉

許占魁陝西蒲城人順治十一年任平陽副將盜張武等盤踞山中時肆劫略為民害占魁受事佯不問令將士分布隘口一日乘大雪率精騎二百徑入山賊皆竄伏莫敢動因縛武而散其黨擢都督僉事後為延綏總兵授世職

贈太子少保謚恪敏

蔣鳴龍浙江建德人康熙八年以拔貢知汾西縣汾西
土高燥田多苦旱又協濟仁義驛馬芻牧胥出里甲
走驛供役者趾相續而驛舍燬於闖非假館無所棲
息鳴龍謂驛傳自有正額革民養馬費還之官建馬
廩於驛堂室庖湏胥具時相度汾濱濬棗平舊渠又
築堤一於前加樓村濬渠三於福珠衛家灘後團栢
村田不苦旱民至今思之

吳軫字星子廣西容縣人順治辛丑進士康熙十二年

知太平縣諳練精敏能先其大者縣城自明季號雄
峙寢壞於雨軫力為修葺復其舊廟學衙署賓賓之
館麗譙之樓以次具舉在任九年吏民畏愛以治行
擢德州知州

袁國梓江南華亭人工文章康熙十二年以進士知平
陽府早起即據堂治文書端嚴如神至日昃不懈事
至出片語裁之胥中肯綮衙蠹市魁帽不敢肆當時
號才吏焉

王槐一河南彰德人康熙二十二年以舉人知浮山縣
浮山丁糧十年例一辦公務費踰正額又商人高鹽
價和以沙土民多坐私鹽論罪槐一胥釐正之設義
學課秀民許訟令自拘立剖曲直胥役終歲不一出
縣門三署隣篆胥有能聲泣任五年以老請歸浮山
人至今誦遺愛焉

王承露山東益都人康熙二十二年以進士知臨汾縣
性嚴正事上官以禮進見輒抗論是非亶亶千百言

不止或尤其強項屹然自若雅有吏材遇事機張理
解胥吏舞文洞鑿本末不少蔽臨汾故繁衝正供外
取於民者纍纍一日檢籍太息言經費自有定制何
重困赤子為胥裁去之民始知曩者之為中飽也後
行取戶曹以去

石文晟奉天人康熙三十年以監生知平陽府時歲饑
會有造船運米役明年復派草三十五萬束轉輸大
同文晟始具詳請賑謂嗷嗷待哺刻不容緩所有借

給米石祈速為接濟又言設廠煮粥止便少壯能就食者至老病婦孺或且坐而待斃祈令散賑官親歷山僻按戶查給繼而具詳請免謂平同相距約一千六百里有奇人負不過五六十斤日行不過六七十里以三十五萬草束計之需夫七萬需時兩月往返工資何可勝計若令折價採買則同人必且居為奇貨不厭不止抑平人當凶荒後造船禹門運米河南其偏苦亦已甚矣祈令太大就近收買庶勞逸得平

而殘黎可起詳上胥獲允行

王輔奉天人康熙三十三年知平陽府有幹略尤能以
嚴重鎮人心三十四年平陽地大震官署民舍胥圯
火數起黠暴復乘閒剽掠輔日夜巡閱聞擒其不法
者寘重典不逞始斂迹死者給以棺不足繼以蓆又
不足為大塚數十男女各以類從俾無至暴露復榜
示能建置堵楹予金若干它郡邑人能占籍曠地亦
胥為永業榜下聞者踴躍赴命今城內大中樓南居

民麟次人猶稱王公街

潘錦字就亭福建崇安人康熙三十三年以進士知曲沃縣幕中無客能儉以成廉下車拔諸生五人後胥列甲乙榜創曲沃志有體裁嘗建節烈祠表烈婦劉小件閭攝絳守伐石樹黨冰壑墓涖任十四年行取仕至通政司參議

李清鎧正黃旗人康熙三十六年以官監知太平縣清靜不撓時巡阡陌勸農桑間至學宮閱諸生課藝訟


期得情而止久之獄寔息盜賊潛踪在任六年人懷之

李紹祖長白人康熙三十九年知霍州性剛直不為勢要人屈涖官廉民胥德之遷潞安府知府會

聖祖仁皇帝巡晉代者未至留辦理公務為一內員所窘
紹祖自刎死霍人號泣詣闕陳訴

聖祖仁皇帝大怒立命巡撫監內員赴霍梟示霍人呼萬
歲聲震山谷及喪出商民胥罷市櫬歸奠道旁者趾

相續復建祠中鎮廟歲時肅祀不絕



山西通志卷九十

欽定四庫全書

史部

山西通志卷九十一

詳校官監察御史_臣查善長

檢討_臣德生覆勘

總校官進士_臣朱銓

校對官修撰_臣吳錫齡

謄錄監生_臣范鳴謙

欽定四庫全書

山西通志卷九十一

名宦

九

潞安府

周

靳黈趙上黨守也秦伐韓一軍臨滎陽一軍臨太行韓請効上黨之地以和令韓陽告靳黈曰秦起二軍臨韓韓不能支今王以上黨入和於秦使陽言之太守

太守其劾之黈曰人有言挈瓶之智不失守器王則有令而臣失守雖王與子其亦猜焉臣請悉發守以應秦若不能卒則死之韓陽趨報王王曰吾始以諾應侯矣今不與是欺之也乃使馮亭代黈

漢

任敖故沛獄吏高祖東擊項籍敖遷為上黨守陳豨反時敖堅守封為廣阿侯食千八百戶高后時為御史大夫三歲免

蔣滿宣帝時為上黨太守子萬為北地都尉並以卓異
徵萬退却不敢並父帝問贊謁者以父子對帝歎息
曰乃父子剖符耶即下詔曰上黨守滿經行篤著信
行山東其以滿為淮陽王相誨導東藩弘農股肱郡
其以萬為弘農太守同日拜擢一時榮之

苟諫為上黨太守哀帝時王莽欲滅鮑宣子孫都尉路
平承望風旨規欲害宣子永諫擁護永名以為吏常
置府中永因數為諫陳興復漢室剪滅篡逆之策諫

每戒永曰君長幾事不密禍倚人門永感其言及諫
卒自送喪歸扶風路平遂收永弟升後太守趙興到
歎曰我受漢茅土不能立節而鮑宣死之豈可害其
子也出升復署永功曹

田邑字伯玉馮翊蓮勺人有大節涉學藝能善屬文更
始初為上黨太守二年與行大將軍事鮑永狼孟長
馮衍繕甲養士扞衛并土而尤善馮衍及世祖即位
遣宗正劉延攻天井關邑連戰十餘合延不得進邑

迎母弟妻子會鄧禹使積弩將軍馮愔將兵擊邑愔
與延悉得邑母弟妻子後聞更始敗乃遣使詣洛陽
獻璧馬降帝遣騎都尉弓里游諫大夫何叔武即拜
為上黨太守屢以書招衍降衍不從永婚張舒誘降
涅城舒家在上黨邑悉繫之遺永書曰張舒內行邪
孽不遵孝友疏其父族外附妻黨已收三族將行其
法能逃不自詣者舒也能夷舒宗者予也永不答自
是與邑有隙而永行後亦罷兵幅巾降邑遷漁陽太

守未至官疾徵還為諫議大夫卒

班稚長子令彪之父有善治

戴涉建武初為上黨太守太行山中有劇賊涉聞鮑昱
有智略乃就謁請署守高都長昱平羣賊道路開通
魏應字君伯任城人習魯詩閉門誦習不交僚黨舉明
經弟子自遠方至著錄數千人肅宗甚重之時會京
師諸儒於白虎觀講論五經同異使應專掌問難明
年出為上黨太守徵拜騎都尉卒

鄭渾字文公河南開封人興之子也建安中為左馮翊
平山賊轉上黨太守渾為郡明禁令以發奸勤稼穡
以勸農由是民安而盜賊止息性清素在公卒之日
妻子不免饑寒

羊衞泰山南城人續之子也世有清德蔡邕以女妻之
衞仕至上黨太守生祐

晉

郭翼直言上書武帝擢為屯留令元帝時南昌熊遠疏

論時政嘗稱引之

呂溫壽張人善書好施有文武才畧拜上黨太守以能稱卒贈豫州刺史

北魏

鄭渾河南儀封人魏太祖聞其篤行召為掾後遷下蔡長天下未定民皆剽掠不念產殖其生子多不舉渾禁其漁獵重加去子之刑後數有戰功遷上黨太守韓念祖為上黨令徐州刺史尉元表念祖始臨之初舊

民南叛撫慰招集南來民費僕先等前後歸附戶至
二百有餘南濟陰郡睢陵縣人趙怜等辭稱念祖善
於綏撫清廉請乞念祖為睢陵令若得其人必能招
集離叛成立一縣獻文詔曰樹君為民之情如此可
聽如請

隋

柳昂字千里河東解人周賜爵文城郡公隋初拜潞州
刺史昂見天下無事可以勸學行禮因上表言之上

覽而嘉納詔天下州縣皆置博士習禮焉昂在州甚有惠政數年卒官

辛彥之隴西狄道人周封五原郡公隋初改封任城郡公累遷潞州刺史有惠政卒官謚曰宣

源崇西平樂都人朔方郡公雄子襲封官儀同大業中上黨贊治入為尚書虞部郎將兵討北海賊力戰死贈正議大夫

唐

王行敏并州樂平人義旗初潞州刺史遷屯衛將軍劉
武周寇上黨取長子壺關上遣行敏馳往守禦賊引
去

李襲譽字茂實金州安康人唐初封安康郡公為潞州
總管突厥既和親又通使王世充襲譽掩擊悉斬之
因委典運以餽東軍後歷蒲州刺史轉揚州大都府
長史所涖以威肅聞後戍卒

李元嘉高祖第十一子初封徐王貞觀六年授潞州刺

史時年十五在州聞太妃有疾涕泣不食十年改封韓王授潞州都督元嘉少好學閨門修整有類寒素修身潔已內外如一高宗末轉澤州刺史垂拱中徙絳州遇害

李元懿宗室子封鄭王初刺兗州徙潞州數斷大獄務寬平城南有元懿太妃墓

崔珏一名元靖樂平人貞觀間為長子令廉介公直發奸摘伏民不敢欺時有虎傷人珏祈諸神遣使追虎

至而殺之民為立石頌德

李嗣正字承胄趙州栢人多藝數尤精音律舉明經歷
縣令以善政聞永昌初歷拜右御史中丞知大夫事
命巡撫河東薦宋溫瑾袁嘉祚李日知拔州縣職皆
至顯官時來俊臣獄方熾嗣正上書切諫出為潞州
刺史為俊臣所誣貶藤州卒諡曰昭

宋璟邢州南和人耿介有大節好學工文辭第進士調
上黨尉居官鯁介景雲初以吏部尚書同三品開元

四年又以吏部兼侍郎封廣平郡公後罷以尚書右丞相致仕卒贈太尉謚文貞

姚崇陝右人睿宗時以兵部尚書出為潞州刺史專務德化政條簡肅潞人為立碑紀之

李潛太宗族子開元中潞州刺史轉劍南節度使所歷以誠信待物稱為良吏卒謚誠

薛僅字用沖漢御史大夫廣漢後開元間上將巡潞藩擇賢能為長吏俾宿儲供僅以拾遺宰屯留略無愠

色躬親庶務諸事克辦朝廷稱之次年歲歉出公私
米賑活以百萬計又防水患邑大治以異能稱民立
碑頌之明正德六年入祠

程千里本磧西人居京兆天寶十四載詔於河東招募
充河東節度副使雲中太守十五載正月遷上黨郡
長史特進攝御史中丞以兵守上黨賊攻城屢為千
里所敗加開府儀同三司禮部尚書兼御史大夫至
德二載九月賊將蔡希德圍上黨輕騎挑戰千里恃

勇開懸門率百騎欲直擒希德幾得而救至乃退會
橋壞馬顛為賊執仰首勅諸騎使還曰為我報諸將
可失帥不可失城軍中皆為泣下增備固守賊不能
下乃還囚千里至東都為嚴莊所害後追褒死難者
惟千里生見執不及云

陸長源字泳之吳人乾元中辟昭義節度薛嵩幕府嵩
侈汰常從容規切嵩曰非君安能為此歷宣武軍司
馬兵變遇害贈尚書右僕射

魏瑒潞州府長史兼御史中丞寶應元年為大元帥府
兵馬使會回紇討賊為登里可汗榜捶死

王虔休字君佐汝州梁人涉學有武材以信義聞潞澤
李抱貞厚幣招之授兵馬使以從破臨洺功擢步軍
都虞候封同昌郡王貞元十年抱貞卒元仲經等謀
樹其子緘虔休正色語衆曰軍王軍土王土帥亡當
稟天子何云云有妄謀衆服其言得不亂德宗嘉之
以邕王為昭義節度大使擢虔休潞州左司馬領留

後號令撫循軍中大治二歲遷昭義節度使檢校工部尚書始屬城州縣守宰多署他職不親政故治苟簡虔休增俸廩遣就部人以安安卒贈尚書左僕射謚曰敬虔休性格敏節用度既沒所部帑廩皆可支數歲嘗得太常樂家劉玠撰繼天誕聖樂因上誕日以獻焉

盧頊潞澤節度王虔休掌書記軍司馬元誼據洺州虔休破之復遣頊見誼陳利害誼請朝請即以頊為洺

州別駕使守洺

韋虛心京兆萬年人湊子舉孝廉歷潞州都督府長史
所在官吏振肅威令甚舉拜東京留守卒謚正

劉潼字子固曹州南華人暹孫登進士第拜昭義節度
使徙河東所治辦卒贈司空

郝士美字和夫高平金鄉人自潞州從事累拜御史大
夫經畧黔中以平賊功封高平郡公元和六年檢校
工部尚書潞州大都督府長史充昭義節度使昭義

自李抱貞以來皆武臣私厨月費米六千石羊千首
酒數十斛潞人困甚士美至悉去之出廩錢市物自
給又盧從史時日具三百人膳以餉牙兵士美曰卒
衛于牙固職也安得廣費為私恩亦罷之詔討王承
宗大將王獻恣橫逗撓斬以徇下令曰敢後者斬兵
最先有功憲宗喜曰固知士美能辦吾事十二年以
疾徵為工部尚書卒謚曰景

辛秘隴西人舉五經歷河東司馬元和十二年代郝士

美為潞州大都督府長史御史大夫昭義節度澤潞
磁洺邢等州觀察使時以再討王承宗澤潞壓境凋
費尤甚秘在鎮四歲約出入嗇用度府庫積錢十七
萬緡糧七十萬斛器械堅良復為完鎮家無豐財厚
產為時所稱名還卒贈左僕射諡曰昭

薛茂卿潞州將剽勇善戰謀歸王宰為劉稹所殺稹誅
詔贈博州刺史

沈詢吳人第進士咸通中檢校戶部尚書潞州長史昭

義節度使治尚簡易人皆便安奴結牙將夜攻詢滅其家贈兵部尚書以左散騎常侍劉潼代為節度馳至剗奴祭詢

孫揆字聖圭潞州涉縣人第進士累拜京兆尹昭宗討李克用為招討副使更授昭義節度使以本道兵會戰克用伏兵刁黃嶺執揆厚禮將用之曰公輩當從容廟堂何為自履行陣也揆大罵不詘克用怒使以鋸解之鋸齒不行揆謂曰死狗奴解人當束之以版

汝輩安知行刑者如其所言詈聲不輟至死昭宗憐之贈左僕射

李殷銳為潞州刺史李克用寇潞州殷銳與昭義節度使康君立俱死之

王中立榆社人潞州節度使竭心力於王室著勞績於戎行內外稱之

李克修字崇遠國昌子從討龐勛以功拜朔州刺史兄克用鎮雁門為奉誠軍使後表昭義軍節度使數出

山東擊孟方立又與李罕之攻懷孟克用自將擊方立還軍過潞供饋甚薄克用怒詬而笞之克修慙憤發疾卒克修為人簡儉潞人素安其政其卒也人皆哀之

李嗣昭太谷縣人天祐三年攻降潞州為昭義軍節度使梁遣李思安將兵十萬攻潞築夾城以圍之朱溫常遣人招降嗣昭嗣昭斬其使者閉城拒守踰年莊宗始攻破夾城嗣昭完緝兵民撫養甚有恩意

後唐

盧文進范陽人明宗時以上將軍出鎮潞州擒奸恤隱
甚得時譽

任圜京兆三原人明敏善談辨李嗣昭節度昭義辟觀
察支使梁兵築夾城圍潞州踰年而晉王薨晉兵救
潞者皆解去嗣昭危甚問圜去就之計圜勸嗣昭堅
守以待不可有二心已而莊宗攻破夾城聞圜為嗣
昭畫守計甚善之由是益知名其後嗣昭與莊宗有

隙園數奉使往來辨釋讒構嗣昭卒免於禍園之力也嗣昭戰胡柳擊敗梁兵園頗有功嗣昭戰沒於鎮州園代將其軍號令嚴肅遷節度判官召還後拜同中書門下平章事致仕安重誨矯制殺之

後周

李筠太原人仕周為昭義軍節度使宋太祖受禪加中書令使者至潞欲拒之賓佐切諫乃宴使者酒半懸周太祖像涕泣不已賓佐惶駭告使者曰令公被酒

失其常性幸無訶北漢主聞之以蠟書約筠同舉兵
太祖手詔撫慰且官其子筠終不聽北漢主親將來
會筠言受周太祖厚恩不敢愛死周漢仇也以故漢
主不悅留監軍而返筠遂南據澤州戰敗而死

宋

李崇矩上黨人宋初為澤潞南面行營前軍都監破李
筠衆于碾子谷澤潞平遣人先入城收圖籍視府庫
後拜樞密使開寶初從征太原班師命為後殿卒謚

元靖

李繼勳大名元城人太祖平澤潞繼勳以安國節度朝
行在即以為昭義軍節度使秋燔平遙建隆二年又
拜并軍乾德二年下遼州又大敗遼師於遼五年加
同平章事開寶初為行營前軍都部署勝於洞渦二
年親征河東又為行營前軍都部署柵太原城南三
年移大名卒贈中書令

張暉幽州大城人周廣順初為晉絳步軍左廂排陣使

宋初從征澤潞為行營壕砦使先登陷陣事平遷華
州團練使建隆二年太原未下詔入覲問計對曰澤
潞經李筠之叛瘡痍未復軍旅一興恐人力重困不
若戢兵育民俟富庶而後為謀乃賜襲衣金帶鞍勒
馬遣還乾德二年卒

王祐字景叔大名莘人杜重威辟鄴支使勸無背漢坐
是貶沁州司戶參軍宋乾德中太祖征太原已濟河
諸州饋集上黨城中車乘塞路上聞之將以稽留罪

轉運使趙普曰六師方至而轉運使以罪獲聞敵必謂儲峙不充有以窺我兵俾能治劇者往涖其州即命祐知潞州及至饋餉無乏路亦無壅尋班師召還太平興國中知河中府

張泛太平興國間為黎城令持身廉介敷政以誠淑人以禮有古循吏風

韓國華字光弼相州安陽人太平興國二年進士至道中知潞州轉運使言其善綏輯供億幹辦詔獎之終

右諫議大夫子琦

柴禹錫大名人太宗時以晉邸舊僚至樞密副使累知潞州勤於政事善撫綏州民乞留三載詔獎之後復知樞密院事卒贈太尉

李允則字垂範謙溥子太平興國末以左班殿直使河東決繫囚原治逋欠天禧二年以客省使知潞州天聖中卒允則洞知人情訟至立斷盜發輒獲守雄州人俱號為名將云

張資祿咸平人為潞城簿平政刑敦禮教吏憚其威民
興於行

吳元辰太原人景德中知潞州初并代澤潞皆分轄戍
卒後并於太原至是以元辰臨鎮遂分領澤潞晉絳
磁隰威勝七州軍事委元辰專總之元辰在藩鎮有
憂民心待賓佐以禮後卒謚忠惠

畢士安代州雲中人乾德進士咸平中為翰林學士以
目疾求解改兵部侍郎出知潞州以廉介聞特加月

給之數入為翰林侍讀學士景德初與寇準同拜平章事卒謚文簡

馬知節幽州薊人全義子景德中累官宣徽北院使加兼樞密副使不為王欽若下大中祥符七年出為潁州防禦使知潞州天禧初移天雄名拜南院使知樞密院事以疾出知貝州上黨大名之民爭來迎謁卒謚正惠

王曙字晦叔河津人第進士真宗末以給事中知潞州

州有殺人者獄已具曙獨疑之既而提點刑獄杜衍至事果辨曙作辨獄記以戒官吏尋徙河南府累官參知政事罷復名為樞密使卒謚文康

范諷字補之齊州人正辭子獻文名試入等復第進士權御史中丞三司使激昂名聲嘗建議朝廷當差擇能臣留以代大臣之不稱職者大臣多惡之諷龐籍彈奏呂夷簡特貶外累知潞州入見上言元昊不可擊獨以兵守要害久當自服上亦稔知其治狀復給

事中卒於官

郭詒字仲謀趙州平棘人聰敏過人第進士精千步方
田法慶歷中知忻州開渭渠道導汾水興水利置屯田
轉運使任頗言詒有巧思自為兵械皆可用詒以所
作刻漏圓楯獨轆弩生皮甲來上上嘉之又知汾州
未上尋徙潞州作鹿角車陷馬槍請廣獨轆弩於他
道詒詒置弩千分給并潞名還提舉百司卒

尹洙河南人知潞州以惠愛為政去後人常思之

劉絢治平間為長子令不鞭扑而賦自集會大旱府遣吏問災傷絢據實上之及報蠲僅十之二絢封還其檄請盡蠲富鄭公聞之曰真縣令也

歐陽棐字叔弼修子舉進士乙科以職方員外郎知襄州有美政忤曾布婦兄魏泰泰譖於布徙知潞州旋罷去後以直祕閣坐元符籍卒

呂陶成都人以集賢院學士論章惇等奸狀出知潞州涖政與俗相安民甚宜之

苗時中字子居壺關人家宿州以蔭入官為潞州司法
參軍郡守欲入一囚於死執不可守怒責甚峻時中
曰寧歸田里法不可奪守悟而聽之熙寧中為河東
轉運使終戶部侍郎

張問字昌言襄陽人第進士熙寧中為集賢殿修撰河
東轉運使坐事貶知光化軍屢言常平助役之苦語
切直驚人歷知潞州官至給事中卒

孫冲富春人以諫議再知潞州以強幹稱

邵伯温字子文洛陽人康節子少從二程子遊元豐間授大名助教調長子尉有德政去監永興軍民思之朱光庭字公琰河南偃師人父景蔭擢第從孫明復學春秋又受學於安定二程元祐中仕至給事中知潞州加集賢院學士鄰境旱饑流民入境者踵接光庭日為食以食之常至暮自不暇食遂感疾猶自力視事出禱雨拜不能興再宿而卒

梁燾字况之鄆州須城人第進士元祐中坐論御史張

舜民不宜斥出為集賢殿修撰知潞州值歲饑不待命發常平粟賑之流人聞之來者不絕燾處之有條人不告病明年以左諫議大夫召甫就道攀轅不得行踰太行抵河內乃已七年拜尚書右丞轉左丞以疾罷坐司馬光黨貶卒

谷大同濟陰人紹聖中為潞城令府志載名宦

劉安世崇寧初知潞州時部使者以蔡京命治郡中事無巨細皆加詳考卒無毫髮可指雖過往驛券亦無

違法部使者深嘆服之

韓昭許昌人宣和中知隆德府有善政民立生祠祀之
孫渤崇寧間任黎城縣才器超逸愛民禮賢六事畢舉
張確字子固邠州宜祿人元祐中進士知汾州宣和七
年徙解州又徙隆德府金圍太原忻代降平陽兵叛
確表言河東天下根本安危所係無河東豈特秦不
可守汴亦不可都矣敵既得叛卒勢必南下潞城百
年不修築將兵又皆戍邊臣生長西州頗諳武事若

得秦兵十萬人猶足以抗敵不然惟有一死報國耳
書累上不報明年二月金兵至知城中無備諭使降
確乘城拒守或獻謀欲自城東潰圍出且探確意確
怒叱曰確守土臣當以死報國頭可斷腰不可屈乃
戰而死欽宗優贈述古殿直學士名見其子宓慰撫
之曰卿父今之巡遠也得死所矣敏容嘆息者久之
孫祖德字延仲潞州北海人第進士以大理寺丞知榆
次縣上書言刑法輕重後以右諫議大夫知河中府

歷知潞州除吏部侍郎致仕卒

李防字智周大名內黃人第進士以著作佐郎通判潞州後以給事中知潞州卒防精力過人好建明利害王靖字詹叔莘人素從子以祖蔭入官累遷提點河東刑獄長子縣賊殺人捕治數十輩不得實皆釋去靖閱其牘曰此真盜也教吏曲折訊囚果服罪仕至戶部尚書卒

李昭玘字成季濟南人第進士以祕閣校理通判潞州

潞民死多不葬昭玘斥官地畫兆窆具棺衾作文風
曉之俗為一變靖康中以起居舍人名而已卒昭玘
自號樂靜先生寓意法書圖畫貯於十囊命曰燕游
十友云

金

沈璋字之達奉聖州永興人遼時學進士業與李師夔
同附金為山西路都轉運副使太行賊陷潞州殺其
守姚璠官軍討平之命璋權知州事璋至招復捕逃

賑養困餓收其橫屍葬之未幾民頗安輯初賊黨據
城潞軍當緣坐者七百人帥府牒璋盡誅之璋不從
帥府聞之大怒名璋訶責且欲殺璋左右震恐璋顏
色不動從容對曰招亡撫存璋之職也此輩初無叛
心蓋為賊所脅有不得已者故招之復來今欲殺之
是殺降也苟利於衆璋死何憾少頃怒解因名潞軍
曰吾始命戮汝今汝使君活爾矣皆感泣而去朝廷
聞而嘉之拜左諫議大夫知潞州事百姓為之立祠

移知忻州改同知太原尹加尚書禮部侍郎時介休人張覺聚黨亡命山谷抄掠邑縣招之不肯降曰前嘗有降者皆殺之今以好言誘我是欲殺我耳獨得侍郎沈公一言我乃無疑於是命璋往招之覺即日降轉尚書吏部侍郎西京副留守同知平陽尹改鎮西軍節度使天德元年致仕卒

韓俊天會間知襄垣縣盜賊蜂起率衆禦之且戰且城寇漸平又築外城民有所恃

蕭仲宣皇統間為昭義節度使政尚平易然能約束小吏不敢為奸賄賂禁絕百姓為立祠

喬辰知襄垣縣嘗著座中銘見藝文志

孫德源大定初遷沙河令大定間改昭義軍節度使潞州破被執俄有拜於前者皆沙河舊民密護德源釋之貞祐二年拜工部尚書攝御史中丞

賀允中大定中遷承直郎行襄垣縣令勤政愛民廢墜

修舉

烏登遼陽人大定間任長子令舊訟牒累千塘至剖決
如流革包納侵漁之弊招撫流移復業民立德政碑
李晏高平人字致美大定間除黎城令修崇學校舉行
鄉飲使民知義遷保德州刺史世宗素識其才召用
之應制揮翰詞如湧泉有蓮炬宮錦之寵官至禮部
尚書翰林苑學士承旨沁南昭義兩鎮節度使致仕
卒謚文簡有文集行世

梁鏜范陽人明昌間為昭義軍節度使觀察判官有惠

政民祀之

納哈塔富拉塔大明路明安人承安二年進士有識慮貞
祐中為戶部尚書言鞏縣以北黃河南岸及金鉤吊
橋虎牢關虢州崕嶺凡斜徑僻路俱當置兵防守下
省院議竟不施行未幾改元帥右監軍兼昭義軍節
度使行元帥府事興定二年潞州破力戰而死贈御
史大夫

必嚕納阿嚕岱貞祐初累官寧化州刺史三年改昭義軍

節度使充宣撫副使閱月權元帥左都監行元帥府
事節度宣撫如故遣都統鄂屯錫爾格復取威州及獲
鹿縣既而詔擇義軍為三等奏去歲初置帥府部分
既定析之將互易其處不相諳委乞無輕變易詔許
之阿魯岱繕完州縣之可守者其不可守者遷徙其
民依險為柵以備緩急澤州舊隸昭義軍近年改隸
孟州又議遷青蓮寺山寨上言距州既遠地形狹隘
恐所保者少所遺者多乃止不遷詔復隸昭義軍是

歲潼關失守趨備商州乃陳河北利害畧曰今忻代
撤戍太原帥府衆纔數千平陽行省兵亦不多河東
河北之勢全恃潞州潞州兵強則國家基本漸可復
立臣已將兵離境乞復置潞州帥府行次澠池詔還
潞州興定元年乃改簽樞密院事阿嚕岱復立潞州
最有功識遼州刺史郭文振舉以為將既而去潞州
張開代領其衆與郭文振不相得文振漸不能守矣
張開賜姓完顏氏景州人至寧末團結鄉兵固守後自

觀州徙軍輝州興定元年遙授澤州刺史三年充潞
州招撫使林州元帥府徙潞人實林州既復遣還開
乞隸晉安元帥府或與林州並置元帥府各自為治
十月開以權昭義軍節度使權元帥左都監行元帥
府事與郭文振共復太原四年封上黨公以澤潞沁
州隸焉五年詔復以涉縣為崇州從開請也元光元
年復取高平縣及澤州二年大戰壺關有功既而潞
州危急開奏封建公府以固屏翰今胡天祚出平陽

郭文振南徙河東公府獨臣與史詠而已乞升澤沁
二州為節鎮以重守禦詔以澤為忠昌軍沁為義勝
軍林州義尖寨衆亂逐招撫使康塘推杜仙為招撫
使開請以盧芝瑞為副代領其衆又奏比聞郭文振
就食懷孟史詠徙解州高倫遷葛伯寨各自保守民
安所仰哉臣領孤軍內無儲待外無應援臣不敢避
失守之罪恐益重朝廷之憂正大間潞州不守開居
南京部曲離散天興初起攻衛州敗績走死初置公

府開與恒山公武仙最強後駐兵馬武山嘗置酒語
諸將曰頃以糧竭為請祈二萬而得二千是吾君相
不以武仙輩待我也時郭文振處開西北當兵之衝
民貧地瘠開又不奉命以糧賑文振軍文振窮竄開
勢愈孤以至於敗

張奇嚕淄川人先為屯留尉致仕家居貞祐初元兵取
淄川乞驢募兵備禦城破率眾巷戰被執不屈死之
贈宣武將軍

楊敏中溜州人為屯留縣尉致仕歸貞祐初元兵取溜州力戰不屈死贈昭勇大將軍同知橫海軍節度使

事

趙岐遼州人知襄垣縣威惠張弛吏民畏服

禹顯代州鴈門人貞祐初隸上黨公張開累有戰功授義勝軍節度使兼沁州招撫副使元光二年四月元大帥塔喇岱按扎爾攻河東張開遣顯扼龍猪谷夾攻敗之擒元帥韓光國獲輜重甲仗甚衆追至祁縣

而還後守襄垣元大帥集河朔步騎數千攻之顯與
戰於玉女寨大獲擢元帥府都監正大六年軍內變
城破被擒不屈死

元

任志潞州人戊寅國王穆呼哩略地潞州志迎降授以
虎符俾充元帥收集山寨數與金兵戰有功金嘗擒
其長子如山招之志曰我為大朝帥豈愛一子親射
其子殪之穆呼哩嘗名諸將議事志亦預徵道經武

安縣已反為金志死之國王令其子存襲

任存襲父職潞州元帥庚寅金將武仙攻潞州存戰死
辛卯正月有旨潞州元帥任存妻孥家屬令有司廩
給仍賜第以居之十一月以存父子死事子立尚幼
先官其姪成為潞州長官待立長還授之成卒授立
潞州長官佩金符後歷澤州尹

道拉錫于闐人至元初為襄垣達魯噶齊有政績民為
勒碑紀之

鄧朗肥鄉人至元間任壺關縣政平訟簡整飭學校遇旱蝗禱雨輒應蝗不為災後陞本州同知入名宦

周幹臣長清人至元中以河東肅政廉訪司知事守潞州時親王錫沙奉命牧馬潞沁間牧人有奪民田為牧地者幹臣詣王啟其事王令悉還其田潞無賴民好解牛以規利幹臣作詩化之民罔敢犯者

傅仲禮元貞間知襄垣縣甚有惠政民思不忘

陳善屯留人大德二年為本縣尹拓修廟學肇啟人文

明正德六年入祀

郭思敬延祐二年知襄垣縣無私交嘗修學校為政能令人畏服

白謙延祐間任黎城令時值大亂後學校荒廢無書籍可讀乃出素所積並廣求四方經史子集凡四千二百餘卷作藏書樓貯之其功在學校甚鉅

蔚恕泰定間知潞州教民興利民多便之

溫珪輔天曆中知潞州有勸課農桑之政

曹璣潞州人知本州有善政

宋思齊屯留人潞州判官才氣英邁儒吏兼通為政寬
仁不尚刑罰

楊綱字道紀永年人至順元年知襄垣縣好儒重士創
修廟學興利除害士民信服

陳伯福後至元間知潞州教民孝弟勸農課桑人咸德
之

張景巖河東人至正間知潞州興廢補弊政多可稱

齊泰至正間長子尹修繕城池表揚耆德

實巴爾至正時任黎城主簿公勤有幹稱賢倅焉

劉依仁淇人至正間尹潞城治效居一時最繼尹屯留
尤以幹濟稱時縣有冤獄依仁一訊辨明之民為立
平冤碑

張鵬翼字大舉河南大梁人至正間為屯留令時盜賊
徧起能親當矢石為百姓禦患又以計擒借盜為奸
者禦寇掠供芻米指顧而辦生平謙沖淡薄絕無饋

遺上官怒廷爭不屈去民為立碑

馬復廣平人至正間為黎城令適蝗旱復引咎自責禱於神蝗尋去大雨滂沱歲乃有秋黎人立碑紀之

周泰東平進士潞州同知以文學飾吏治一時著作多出其手

郭從善至正間為上黨令時盜賊縱橫從善能和輯其民整義旅與關保和爾齊犄角破賊保全澤潞與有功焉

關保河南人至正間為總兵伊罕裨將時晉冀盜起調
禦澤潞與招討萬戶和爾齊展築城垣併力守禦盜
據澤及高平整兵勦之盜幾盡杏城盜首劉子才復
侵澤潞亦設奇勦之功聞進侍郎仍賜龍衣金帛有
差值旱蝗秋復大水徧禱山川回歉為豐民獲安堵
尋以攻汴功加山東樞判同僉院累贈級左轄
和爾齊招討萬戶澤潞左轄佐守禦之責勵協恭之誠
遂建奇功終昭令譽

明

任昂河陰人元進士博覽羣書早有才譽拜晉寧尹不受洪武初以儒士為襄垣訓導後為禮部尚書禮制多所裁定予告歸

郭栢福建閩縣人洪武初以進士任壺關縣丞存心仁恕嘗鑿惠澤池於南關迄今賴之

蔡景武汜水人洪武初知潞州以公勤著陞嘉興知府多惠政

張璧蒙城人洪武初知潞城縣修舉廢政招撫流移政
行期年吏畏民懷

嚴祀臨川人洪武初任黎城主簿治煩以簡愛民以誠
陞武功縣知縣

張三同字大亨直隸阜城人洪武初以進士任潞州同
知以勤恪著創州治修廟學在城二十四坊皆所定
也尤加意學校兵戈之餘絃誦不輟祀名宦

張思中樂清人洪武間潞州同知廉幹勤敏陞工部都

水司郎中

劉任原昌平人洪武間知潞州政行茂著德澤及民陞
本省參政

崔鳳河南項城人洪武間知黎城縣時當兵燹後井里
盡墟官廳秩祠僅存壁趾鳳下車招復流移撫恤如
子因以其暇修舉頽廢邑漸以治陞直隸大名府同
知

袁有常直隸正定人洪武間知襄垣縣政寬不弛值大

饑多方撫綏民無失業

艾敬三原監生永樂間知長子縣有政聲

黃壽靖州人宣德初知潞州嚴不入苛吏民畏服任滿
當代潞人保留復歷二考致仕

燕雲咸寧人宣德時為潞州知州大著聲績

郝景隆山東蓬萊人宣德間以舉人為長子簿會學宮
傾圮捐俸修葺歲旱禱雨雨輒應既去民思之

阮河交趾人宣德間任長子縣典史永樂初交趾入職

方河率先歸附以功授雲屯縣典史及犁氏亂抱印航海以其家來歸改長子勤於其職卒遂占籍焉子勤以進士官刑部侍郎贈河通議大夫祀名宦

喬育宣德時為襄垣主簿部民言其賢特命超遷勸之張維祥符人正統初壺關教諭教有成績陞浙江道監察御史

刁正東鹿人正統初知潞州政尚慈祥尤善作興士類後陞武昌府知府

徐充山東商河人正統間以太學生知長子縣募丁壯
建城樓設器械以備邊警歲歉加意賑恤民無流移
洪鈞新城人正統間以舉人知屯留縣有德政芝草生
於堂柱

張璟臨潼人正統間知潞城縣涖官清慎修學造士尤
得人心陞苑馬丞

王鏞江西廬陵人天順間以舉人任潞州學正學博行
高勤於訓迪經指授者各有成就諸生皆以義盡仁

洽稱之後陞國子監學正

張曉陝西三原人成化六年以進士任襄垣縣廉謹愛
民政無不舉有清水明鏡之謠徵拜御史官至按察
使入名宦祠

王紳字晉卿湖廣安化人成化間以進士知屯留縣有
才畧為政不拘一轍簿書之暇親巡阡陌勸課農桑
又時進諸士子講學課藝尋擢御史累官副使祀名
宦

王祐山東金鄉縣人成化十四年由監生知壺關縣鋤
強扶弱四民樂業後以憂去入名宦

易鶚固始人成化間以進士知長子縣剛明果斷政先
躬率多惠政陞御史

甯智成化間知襄垣縣創建城樓有仁聞祀名宦

劉瓚直隸清苑人成化間以進士知襄垣縣值大饑賑
救有方全活甚衆祀名宦

李崙陝西臨潼人成化間以進士知屯留縣甘貧好學

不事修飾時大饑役民鑿河河治而民不飢全活頗衆歷河南參政正德六年入祀

馬暉河南陳州人弘治間以進士知潞州性剛守潔才具明敏大修廟學俎豆筐篚象勺干舞之類纖悉必備訪得名宦十四人鄉賢十人建祠為州人表帥而撫恤窮黎諸政以次畢舉在任九年上黨人謂自建州以來所未有云

曹蘭蘭州人弘治間壺關教諭學問該博尤善啟迪後

登進士歷巡撫都御史

張友直三原縣人正德十四年以舉人任壺關縣舒徐
溫雅輯縣志未就陞任去

張萱應天上海人正德間以進士知潞州潞有德風亭
自唐以來稱勝地萱日夜勤民事終其任未嘗一往
嚴馭吏胥不使入鄉間罷錦綺之售於上官里夫之
役於藩府者不使為民擾武宗狩雲中倖臣江彬諷
郡縣選嫠婦送行在所萱曰嫠節婦也奈何奪人之

節力爭事得寢後擢湖廣僉事潞人攀轅泣送者數萬人後復建祠祀之崔銑有記

吳傑字漢甫河南杞縣人正德間以舉人知壺關縣孤介廉潔不苟同世俗舉於鄉猶躬耕自給母亡貧不能葬流賊至傑守母柩不去及涖官衣大布衣食脫粟飯甫四月儲倉穀二千餘石有故人稔其治行欲薦諸朝傑曰使我賢耶薦不必公使我不賢耶公不必薦後卒於官至不能為殮同官醵錢賻焉其妻弗

受曰吾夫生平不愛一錢豈以死易哉聞者高之
張鵬翰陝西慶陽人正德間以進士知襄垣縣清苦自
甘均荒田溢額於全徵中民不為病復以其餘創置
學田寒士賴其賑恤

楊盈山東章邱人正德間以舉人知潞城縣剛介明敏
有不可奪之操申禁諭而強梗寒心勤勸課而士習
丕變為一時才吏民建祠於邑之東關御史溫如璋
作文紀之

胡侍寧夏人舉進士歷官鴻臚少卿張璫桂萼擢學士侍劾二人越禮背經反覆辨論千餘言命逮治言官論救謫潞州同知剛介不阿持大體抗言時中藩府宗室勛注以事憾之奏侍試諸生題譏刺且謗大禮逮至京訊斥為民卒

王致中洛陽人正德間潞州學正教人有方講學不倦劉明濮州人廕生正德間以任邱丞陞任襄垣精明廉慎吏民畏懷修築城池功在後世祀名宦

苟京陝西商州人正德間以太學生知黎城縣時流寇猖獗京備設守禦修浚城隍添設樓櫓保障之功民甚賴之

陳大綱慶陽人震子正德間進士任山西僉事土豪陳卿據青羊山作亂中外震恐剿撫未決獨大綱與都御史力主剿滅以威奸宄人頗難之大綱作平賊方略六篇地形險易斷山伐木為飛梯望樓出其背三軍拔援而上賊聞駭曰官軍飛上山也卿遂降陞密

雲兵備

倪政甘肅人嘉靖間以貢同知潞州政家世將門謀而有勇平青羊之變與有力焉

宋圭新城人嘉靖間以進士知潞安府性寬平復能諳練庶務設府之始凡所經畫必協人情合理俗上下宜之後陞徐州道以去

侯有功號風山浮梁人嘉靖間以進士知潞州治尚嚴明法行自近而於閭左細民則寬以字之復選擇才

俊督令讀書政暇親加品題所甄許無不掇高第者
好微行屬吏凜凜奉法郡境肅然

賈應春正定人嘉靖間以進士知潞安府器宏才練弛
張協宜剖決如流豪右畏若神明

葛大紀商州人嘉靖間以進士同知潞安厚重持大體
不假威嚴人自起敬歷官本省參政

崔鏞綏德人嘉靖間以進士任潞安推官和易可親而
中有定見官至本省巡撫

楊良臣即墨人嘉靖間以舉人知黎城縣政尚平易勸
農興學有實政陞太原府通判

葛縉昌邑人嘉靖間以進士知襄垣縣政教嚴明民安
盜息仕至本省巡撫

况增光盩厔人任潞城教諭問學宏深操履慎重陞浮
山縣

王憑臨邑人隆慶間以舉人知潞安府有雅量始終未
見其怒然三尺法無敢撓者吏弊一敗雖不窮追鎗

其根亦不得再發朔望謁廟畢與諸生論說理奧多所發明以憂去士民攀送車不得行官至大參

張嘉孚號立菴陝西安定人嘉靖間以進士任長治縣明敏善斷遇訟者給片紙令自拘到案隨剖其曲直不數言輒得其情復為善言解之不數用鞭扑少頃兩造各得意去呼續至者入復如前後陞戶部主事祀名宦

辛應乾安邱人嘉靖間以進士知壺關縣德量寬洪顏

廢修舉著牧羊說陞主事

李用敬山東益都人嘉靖間以進士知壺關縣性簡易
不尚刻覈遇訟獄以片辭決之有未服聽其言頗直
悉心推鞫不曲徇己見翻然改從無難色質成之下
皆以為無冤後入為給事中累官至通政使祀名宦
尹梁晉州人嘉靖間以進士知長子縣性坦率與百姓
若家人父子自奉甚菲寒一褐暑一布而已陞戶部
主事祀名宦

張煥益都人嘉靖間以進士知長治縣言訥行果外剛
內慈洞悉閭閻疾苦真心撫字左右近習讒愬不得
行冰蘖之操始終不渝陞給事中

李淳濮州人嘉靖間以進士知潞城縣嚴明慈惠民有
青天慈母之謠陞主事

王維垣直隸武清人嘉靖間以進士知潞城縣值陳卿
變官軍失利欲屠邑維垣力請於上乃止而招脅從
安反側其功為尤多陞主事

劉大武江陵人嘉靖間以進士任潞安推官值旱步禱
五龍山拜畢還雨即隨之衣盡濕左右進肩輿不許
是歲大稔陞主事

徐元道陝西秦州人嘉靖間以貢知平順縣寬厚恤民
有智略能任事時初設縣治元道悉心經畫城池廟
社數年規模始定致政去

張汝乾雒南人嘉靖間以貢知屯留縣邑有金龍池禱
雨輒驗汝乾至屢禱弗應因命濬池得伏屍曰此冤

鬼也祈夢於神神曰李姓弟殺兄也詰朝訪村民李逢奇因謀產殺兄逢春已三年矣一鞠而服是夕大

雨

董遂河南嵩縣人嘉靖間以進士知襄垣縣邑有乘暗殺人者密察得其人置之法人稱神明性至孝聞母病徑棄官歸監司素重其人促令還任母病愈始就道政成徵拜給事中歷本省副使

段錦山東恩縣人嘉靖間以進士知壺關縣嚴毅有威

望臨民以莊嘗規人情土俗為科條揭通衢宿猾巨
奸咸懾伏後擢御史累官布政使參議

王禮直隸完縣人嘉靖間任壺關縣縣丞有執持能自
愛數折疑獄民程虎山者嘗殺人藏其屍以無左驗
不坐罪禮奉委往檢忽風起馬前禮曰此冤氣也隨
風迹之輒得虎山論如法

薛騰蛟號南崗陝西渭南人嘉靖間以進士知長治縣
時縣新設制度未備蚤夜殫思多所裁定飭章程節

里甲抑強扶弱崇禮勵俗務與民休息而馭吏胥則甚嚴不少貸焉陞主事祀名宦

丁惟寧號少濱山東諸城人嘉靖間以進士知長治縣縣宜桑人多以紬為業往時上官來取差役需索無已民甚病之維寧獨力為裁抑不少徇徵拜御史官至湖廣副使

靖四方淇縣人隆慶間以舉人同知潞安練達精明諸事就矩歷官僉事

劉四科號健菴陝西涇陽人隆慶間以進士知長治縣
沈毅淵博居官廉簡有守嘗值編審携書吏數人入
參府設警柝於外有巡視少年受錢五十文廉得之
即枷責不貸事訖人稱公明後擢吏部主事累官兵
部尚書

徐鳴鶴杞縣人隆慶間以進士知屯留縣時尚苛猛鳴
鶴獨任寬平有視民如子之心不競聲華人自以為
莫及陞御史

奈邦奇陝西鳳翔人隆慶間以舉人知壺關縣緩征疎
網與民休息謙恭下士接紳衿以禮時時引見訪民
間疾苦興除之期年後閭里改觀後擢指揮累官府
同知民為樹去思碑

麻永吉號慶川慶陽人自庶吉士改御史萬曆間任潞
安知府性長厚其治主於不擾嘗易二紬既而悔曰
價雖售恐開取用例仍還之六年市肆不知供應陞
本省副使

劉復初號天虞陝西高陵人萬厯間以進士知潞安府
剛方自守時府學規制未備建尊經閣於北義陽文
昌魁星三樓於東興賢育才多所成就性剛方廉介
守上黨機杼之地未嘗履一絲曳一組尋以貢篚拂
中官意降廣東提舉後歷官太常寺卿

張鶴騰字元漢隸川衛人萬厯間以進士知潞城縣尋
調榆次鎮密有守兩宰劇地清操惟一擢刑部主事
幾不能具道里費士民立祠祀之

靳賢靜寧州人萬厯間以舉人通判潞安有治民才歷署州縣編審聽訟人人稱平催科得法民間輸納恐後政聲大著委署無虛日皆稱任使陞岢嵐州不就張主敬栢鄉人萬厯間以進士知長治縣性廉潔一清如水創建考場歲省民間數百金修縣志義例尤嚴

陞主事

崔爾進西安右衛人萬厯間以進士知長子縣俗刁悍有自稱劉千斤不畏府君者爾進執之令曉夜巡城

已復慰諭遂成良民編審時富民類衣敝垢冀避徭役爾進廉所易衣悉置其側乃具服擢御史

喬木上海人萬厯間以進士同知潞安嚴能馭衆明足服人尤重文學士凡所甄拔後皆知名陞河南僉事洪良範沂州人萬厯間以進士知潞安府精明英察雷厲風行豪蠹一時斂迹佐領差役皆由堂撥嚴禁坊里不許支官以寬物力陞副使

陳儒號鑑韋新建人萬厯間以進士知潞安府改建長

治學創書院延紳士會講多所發明又置學田修西城水插以備蓄洩革收頭以蘇里甲人皆稱之陞河南副使

經學參全州人萬厯間以舉人知黎城縣寬嚴並用豪猾斂手良善鼓腹至公編審絕弊實尤足為法

方應明河南光州人萬厯間以進士知壺關縣廉明公正斷獄如神多所興革民立祠祀之所著有治壺論日中碑諸刻調洪洞縣

李杜永年人萬歷間以進士知潞安府寬厚明決張弛俱宜賑饑懲奸地方安堵陞陝西副使

李仙品高陵人萬歷間以進士知長治縣導揚風化不事鞭扑務為教養之實陞揚州府同知官至偏沅巡撫

耿鳴世新城人萬歷間以進士官御史左遷潞安推官性耿介見有不可即正色糾列上官咸虛懷受之陞主事

張泰階上海人天啟間以進士知潞安府敷政寬和然能自守不為不義屈有中官乘傳於上黨氣焰甚熾監司以下俱郊迎泰階惟遣人投刺而已中官雖甚怒卒不能加害

苟好善陝西醴泉人天啟間以進士知長治縣英毅明敏政聲最著尋以憂去後官至濟南知府死於難

楚瑁徐州人知屯留縣創縣治廟學及驛遞舖舍規制

備具

焦浴號警盤陝西寧夏人崇禎間以貢任潞安府同知
剛果有胆力能當大事協道臣王肇生平徇賊督帥
臣曹文詔勦流賊王加印俱身先士卒所向有功題
授本府知府時藩王側有怙勢作威福者浴廉得之
立置於法又以盜賊蜂起奸宄易生建街巷柵欄修
城頭堞口尋加副使銜仍管府事後調汾州府遷本
省糧儲副使

艾徵泰米脂人崇禎間以舉人知屯留縣申蠲荒糧民

賴以蘇陞偏關同知

饒九卿四川資縣人崇禎間由恩貢知平順縣鋤強去
蠹崇儒重道以丁艱回籍

文運衡三水人以舉人知黎城縣嚴毅公正事皆得體
尤能轉移風氣陞昌平知州終衛輝府知府至今稱
廉明者必曰文公

徐明揚浮梁人崇禎中以貢知平順縣六年四月流寇
來犯或以城小無備乞避之明揚不可設策守禦城

破不屈死

靳聖居字淑孔長垣人崇禎元年進士由照磨擢潞安推官再被謫後遷慶揚府推官十六年十月殉城

國朝

高復興直隸成安人順治二年以貢知平順縣平順介萬山尤易潛青羊之孽復興廣招募勤訓練約束嚴明奸翫懼伏不敢動躬課農桑土闢氓聚山砦孽胥革面後擢紹興府同知

李雲起昌黎人順治三年以進士知黎城縣姜逆之變
大兵南下賊崩潰而土寇趙聯芳胡尚文煽亂雲
起死焉

薛引隆韓城人順治四年以進士任壺關知縣飛蝗入
境齋肅以禱雨降蝗不為害後補星子卒於官

佟學詩遼陽衛人順治五年以貢生知襄垣縣姜逆之
亂聞沈賊陷郡城亟趨救中途為賊執不屈死之

楊致祥遼東人順治五年任潞安府知府勇敢有為姜

逆之亂誓衆死守會叛丁張國威等陰通賊遂遇害
贈太僕寺卿祀忠烈祠

靳秉璋寧晉人順治五年以進士知長治縣姜逆之亂
沈賊陷長治誘降不屈死之

司九韶直隸內黃人順治六年以拔貢生任潞安府推
官克舉其職姜逆之亂與知府楊同日被害

贈按察司僉事祀忠烈祠

李允升滿洲人順治六年以貢生知長子縣姜逆之亂

其黨沈夜半冒官軍入城允升為所執抗節不屈死
之

陳思忠遼陽人順治六年以生員知屯留縣姜逆之亂
為沈賊所殺

王奕葉五臺縣人順治間以貢生任襄垣縣訓導姜逆
之亂沈賊陷潞安抗節而死

崔珩絳縣人順治間以舉人任壺關縣教諭姜逆之亂
城破死之

薛起鳳韓城人舉人順治十一年任黎城縣知縣有幹
濟才嘗造耕織具教民請豁勘荒糧後改筠連卒於
官

孫光耀屯留知縣孫奎之父也姜逆之亂慨然以勦滅
為己任尋歿於陣有專祠

金光昊字侶樵全椒人康熙五年以舉人知長子縣性
嚴正不妄接人僮僕裁給掃除胥吏作奸痛懲之不
少貸豪猾皆聞風遠遁勸農巡阡陌間進野老爾汝

相狎俾得各言疾苦歲旱修雩祀膝行者數十里涕
洟洟如雨甫一年卒邑人修勸農坊以志遺愛

梁鳳翔咸寧人康熙癸丑進士累官潞安知府釐中飽
禁私派以足疾乞歸潞人懷之

唐大陶四川成都人康熙十年以舉人知長子縣雅擅
文學尤長於言兵涖任以經術飾吏事

曹有光江南績溪人康熙十二年以進士知壺關縣卒
於官有光性澹泊食不兼味或以芑苴竿牘進直斥

之政以嚴濟寬雅符國僑武侯遺指椎埋胙篋胥斂
迹卒之日圖書數卷幾無以為斂邑童叟胥為流涕
于澤長山東人康熙二十年知長治縣性慈厚有吏才
時買解草豆有賦額一兩費至八九錢者下令民間
令自買自解官吏胥無得與李太守白川無後僕李
國明發塚取甌石立寘於法而治其墓

李時謙淮安籍大興人康熙年以進士知潞城縣性抗
直而有吏材嘗給牛種督力作製紡織具令嫺習女

工復為清積年逋賦勤課諸生治行推潞城第一後
以御史巡鹽河東入潞城名宦祠

程大夏湖廣人康熙年以進士知黎城縣性平易兒童
婦女胥得陳疾苦清潔不妄取一錢又勤其官治文
書不少輟加意學校以文藝請者抉摘是非不少隱
洎任五年士習民風一變行取邑人送者如雲後聞
其卒復設位祭之

山西通志卷九十一